



TAPAK 3

Assam MLA-i ULFA-I tanishir Paresh Baruah dang temai adoktsü mepishi



TAPAK 8

NCP-i PM KP Sharma Oli party nungi mintok

VOL. XVIII NO. 102 (ADOK 102) DIMAPUR

SANGTENNÜ (TUESDAY) AENJETI (JANUARY) 26, 2021 ₹ 5.00

Tanü Dimapur nung dokantem shibangtsü

Dimapur, January 26 (TYO): dokantem ajak shibangtsü, ta Dimapur nung January 26, 2021 anüngdang 12:00 ako Soundararajan, IAS-i tanü tashi shishilembadak aser metetdaksüogo.

Nagaland nung April ita HSLC & HSSLC tatidang agitsü

Dimapur, January 25 (TYO): Taküm April ita nung High School Leaving Certificate (HSLC) aser Higher Secondary School Leaving Certificate (HSSLC) examinations 2021 agitsü ta Hombarnü Nagaland Board of School Education (NBSE)-i metetdaksüogo.

Taküm April 7 nungi April 21 tashi HSLC Examination 2021 aser April 6 nungi April 29 tashi HSSLC Examination 2021 agitsü, ta NBSE-i ashi.

Tatidang anaprong indang results ji June ita sangdongtsü. Class XI Promotion Examination ji pei pei school nung dang March 11 nungi March 31 tashi agitsü, ta NBSE-isa metetdaksüogo.

NBSE-isa tatidang ajak offline mode nung agitsü ta ashi aser website www.nbsenl.edu.in nung tatidangtem indang routine angutsü.

Science stream aliba school aser rejutemi class XI aser XII kaketshirtem atema practical class agitsü akok. Iba ya practical

syllabus nung dang ajemdaker agitsüla, ta parnokisa ashi.

NBSE-isa tesayurtem dang subject ajak atema practical class agitsü aser iba nung ajemdaker kaketshirtem asadangtsü shiogo.

HSLC, Class XI Promotion aser HSSLC Examinations 2021 magidang school temi online/offline mode ajanga subject ajak atema internal assessments/project works inyaksüla ta NBSE-isa metetdaksü.

School temi internal/practical/project work agiba sülen NBSE dangi marks yoktsü atema renema ayutsüla. 2021 examinations atema reduced syllabus osangji subject tesayurtemi kaketshirtem nem metetdaksütsüla, ta parnokisa ashi.

School temi February 6 nungi February 12 tashi nung NBSE dangi model test results yoktsüla. Kaketshirtemi tatidang agütsütsü atema renemtsü asoshi school temi remedial/coaching classes online/offline agitsüla, ta NBSE-isa ashi.

Dimapur Tribal Hoho Forum-i metetdaksür

Dimapur, January 25 (TYO): January 25, 2021 nü Tourist Lodge nung Dimapur Tribal Hoho Forum senden ka amendang kin 19 nungi 12-i shilem agiogo.

Senden nung mendenji Sessional Convenor L.Wati Jamir liasü aser Naga Council Naga tanishir asür Ghoketo Yeptho nem tetushi agütsüba sülen senden tenzüik.

Tanü senden nung Tribal Hoho Forum-i Peace Committee ajanga agütsüba osang molunga agizük.

Dimapur Tribal Hoho-isa pei pei Councillor tem dang Naga Council

Dimapur-i Jnauary 27, 2021 nü senden ayongba nung madentsü atema tetuyuba agütsütsü lemtet.

Forum-isa Councillor tem aser Tribal Hoho Forum züngsem ajak den senden ka ayongtsü telemtetba agi.

Tanü senden nung Dimapur Tribal Hoho nung Sessional Convenor inyaksü atema Zhato Angami aser Sessional Secretary inyaksü atema Wanthang Rengma shim.

Sentong nung Lotha Hoho tir Y. Jami, Retd. IAS-i temoatsü meshia sarasadem.

DNSU-i Dimapur nung Cyber Cell lapoktsü nungiter

Dimapur, January 25 (TYO): Tenyimi Students' Union Dimapur-i Dimapur nung Cyber Cell ka lapoktsü akhangba pusema Dimapur Naga Students' Union (DNSU)-ia bangdak ketdangsürtem dang tekaraba nung iba mapa inyaksü metetdaksüogo.

Tanü internet amshiba ajanga nübortem asoshi Cyber crime ya tebilemstü tulu ka lir. Ajisüaka,

Nagaland nung Kohima nung dang cyber cell lapoka aliba osang atema sasaa bilemer, ta DNSU-i ashi.

Nisungtemi Cyber crime ajurudang Kohima-i oa ken o benokbaji tim masü. Anungji Nagaland nung aliba police station tem nung cyber crime atema Zero FIR system inyakyim tenzüiktsü mepishir, ta Media Cell, DNSU sangdong ka nung metetdaksü.

NFHRCC-i senden ayonger

Dimapur, January 25 (TYO): Nagaland Foothills Road Co-ordination Committee (NFHRCC)-i Dimapur nung kin hohotem den January 30, 2021 nü senden ka amentsü ayongzükogo.

Sendenji Kher Mahal, Dimapur nung anepdang 10:00 ako nung agitsü aser Foothills Road Project

dak sendakba onüktem benoka lemsateptsü. Anungji, Tribal Hoho shia nungi Chairman/Secretary arua adentsü mepishir, ta NFHRCC Convenor Supu Jamir, Gen. Secretary W. Lemba Chang aser Asst. Gen. Secretary Chenithung Humtsoe nungeri külem sangdong ka nung metetdaksü.

Nagaland nung 11 buba National Voters Day among



January 25, 2021 nü Capital Convention Centre, Kohima nung Nagaland Chief Secretary, J. Alam (IAS) den ketdangsürtemi 'a Glimpse of SVEEP activities in Nagaland' kaket sayatsüdag agiba noksa angur. (DIPR, Kohima, January 25)

Dimapur, January 25 (TYO): January 25, 2021 nü Capital Convention Center, Kohima nung 11 buba National Voters Day mongogo.

Iba sentong ya state Election Department ajanga ayong aser taküm indang omenji "Making our voters Empowered, Vigilant, Safe and Informed" liasü.

Nagaland kübok district headquarters, sub-divisions aser polling stations ajak nung sentong balala ayonga agiogo.

Iba sentong nung Chief Electoral Officer, Nagaland, Abhijit Sinha (IAS)-i o jembidang National Voters Day indang lemsatep.

Vote enoktsürtemi khuret ajuruba koktettsü atema Election Commission (EC)-i kümshia January 1 nü arishi küm 18 ajungertem bushir. Linük kübok

polling station lakh 8.5 tema nung vote enoktsürtem bushia züngsemer, ta Abhijit Sinha-i ashi.

Item voter tasentem mapang shitak nung tenüng zülüoker aser kümshia January 25 nü parnok nem Electoral Photo Identity Card (EPIC) agütsür. Iba ya lanurtem dang tashi metetdaksüba den khuret koktettsü atema ajungmesotsü atema inyaker, ta paisa metetdaksü.

Paisa vote enotsürtem dang tetsüba mesüra tangar nem memesüzükdaksüi election nung shilem agitsü ayongzük.

"Election dak sendakba maparen nung tim masüba aika lir anungji asenoki ibaji kanga junga metettsüla" ta Abhijit Sinha-isa nenshia ashi.

Sentong nung Nagaland Chief Secretary, J. Alam, IAS-ia vote

enoktsürtem bushia züngsemertem dang pelaba metetdaksü.

"Election ya mapa tulu lir aser onük aika sendaktepa lir. Vote enoktsüba ajanga sorkar akümer anungji asenoki vote enoktsürtem dang political party aser candidate temi mapa inyaksü sentong renembatem jungjunga metetdaksütsüla" ta J. Alam-isa ashi.

Tanü e-EPIC system tenzüikba indang olen ka ashidang J. Alam-i "iba ya portable document ka lir aser mobile mesüra computer ka nungi download sür print asütsü akok" ta metetdaksü.

Iba sentong nung Nagaland Chief Secretary J. Alam-isa 'A Glimpse of Systematic Voters Education & Electoral Participation (SVEEP) Activities in Nagaland' kaket sayatsü.

COVID-19 Nagaland: Nisung 3 dak putet; 10 taneptsü angu

Dimapur, January 25 (TYO): Hombarnü Nagaland nung nisung asem dak COVID-19 aliba putet aser 10 taneptsü angu.

Tanü nisung asem dak putetba züngsema Nagaland nung nisung 12,079 dak COVID-19 putetogo.

"Tanü Dimapur nungi nisung 3, Kohima nungi 2, Mokokchung nungi 4 aser Mon nungi nisung ka taneptsü anguba züngsema taneptsü angur ajak agi 11,753 kümogo," ta Health & Family Welfare Director, Dr. Denis Hangsing-i ashi.

Tang tashi nung COVID-19 puteta alir nisung 88 süogo aser 142 tanga state temi ogo, ta paisa metetdaksü.

District balala nung COVID-19 putetba: Dimapur (6,465), Kohima (3,777), Mon (605), Peren (506), Tuensang (246), Mokokchung (192), Zunheboto (142), Phek (47), Kiphire (41), Wokha (39) aser Longleng (19).

Nisung 12,079 rongnung Traced Contacts 4,982, armed forces personnel 4,667, tanga state tem nungi arur 1,857 aser Frontline Workers 573 lir, ta Dr Hangsing-isa metetdaksü.

District balala nung tang anepalurtem: Kohima (47), Dimapur (38), Mokokchung (8), Peren (2) aser Tuensang (1).

Tang anepalurtem rongnung

nisung 13 dak shirangba yimya terara lir aser 2 oxygen agüja anepaludar. Nisung 87 dakbo shirangba yimya kecha mali, ta Dr Hangsing-isa metetdaksü.

Taneptsü angurtem: Dimapur (6,294), Kohima (3,672), Mon (594), Peren (504), Tuensang (243), Mokokchung (175), Zunheboto (139), Phek (47), Kiphire (40), Wokha (35) aser Longleng (10).

Nagaland nung COVID-19 alitsü akok ta temolung melemi bilemba sample 1,24,078 tendangogo. RT-PCR ajanga sample 72,972, TrueNat ajanga sample 37,066 aser Rapid Antigen Test ajanga sample 140,40 tendang.

Minister Along-i kaketshirtem ayongzük

Kohima, January 25 (TYO): Hombarnü Higher Education & Tribal Affairs minister Temjen Imna Along-i Coraggio School indang campus tasen ka sayatsüogo.

"Nisung kati langka ka akümtsü alizüng ayur, ibaji atongtsü meranger aser anogoshia iba atemaji meranger. Nisung ajaki iba tangatetba nungji taküm liyonga ora, linük, state, nür kin, nür nisungtem, nür tsüraburtem aser na atema alizüngtem tongtettsü" ta Minister Along-i ashi.

Paisa kaketshirtem dang pei pei alizüng atongtsü atema tanen makai inyaksüla asr ibaji

atongtsüla ayongzük.

"Nü tsüraburji aluyimer ka asütsü ako, yimtsüng nung süra ki ka nung alir asütsü akok. Ajisüaka, nai nüma atangtsüla kechiyong parnoki na ajungtsü aser nü alizüng tongdaksütsü atema meranga inyaker" ta paisa ashi.

Sentong nung Coraggio school chief patron Vilelie Khamo-i wako salatsü aser school indang osang lemsatep.

Sentong nung Board of Directors chairman Dr. Hovithal Sothu-i tesentepertem pelaa agizük aser Neikesenuo Bei-o ajanga school indang osang tatsü agi

lemsatep.


Iba school nung 'Gethemgo Sports Academy' lapokba indang osangji Gethemgo Sports International director Dr. Viposa Kiso-i metetdaksü.

Iba sentong nung Sports & Youth Resource Advisor Er. Zale Neikha aser tanga tongti ketdangsürtem aika aden.

Coraggio School ya Lerie Colony nung lir aser 2004 küm Vilelie Khamo-i pa tetsü asür Lechale Khamo nüngtem nung lapok.

Iba school nung Class 10 tashi lir aser omenji "Aspire, Act and Achieve" lir.

Dimapur nung National Voters' Day mungogo



Tanü Dimapur nung 11buba National Voters' Day amungdang DC, ADC & AEO den voters tasen kar noksa nung angur. (IA Dimapur, Jan. 25, 2021)

Dimapur, Aenjeti/January 25 (TYO): Dimapur nung January 25, 2021 nü "Making our Voters Empowered, Vigilant, Safe and Informed" omen nung ajemdaker 11 buba National Voters' Day mungogo, kong Deputy Commissioner & District Election Officer, Dimapur, Rajesh Soundararajan ya tesemdanger tongti liasü.

Taxes Commissioner indang Conference Hall nung iba sentong nung jembiba mapang, Indian democracy tamendak dak ya universal adult franchise benokba ya alitsü, koba agi tamangba yimsü aser kin telemsa makai temsüa aliba senso ajunga nem vote agütsü temeden agütsür, ta Deputy Commissioner, Dimapur, Rajesh Soundararajan-i ashi.

Taoba mapang temsüa aliba vote aika electoral roll nung meinoksem saka Election Commission aser yangji sendaka alirtemi meranga inyakba ajanga Elector shilem 100 mejungaka aika renlokogo aser ano maneni yimya balala ajanga inyaksü, ta pai ashi.

BLO temi meranga inyakba, aser sorkar mapa inyaker ajaki election mapang tongtipang shilem agiba atema DC-i tenüngsang agütsü. Lanur vote agütsüsupur tasentem den tepela lemsatepba mapang parnok nem agütsüba tashi kanga kumdanga amshitsü, District Election Officer, Dimapur, Rajesh Soundararajan ajanga ayongzük.

Iba sentong nung Assistant Election Officer Dimapur Roland Merry menden liasü

aser pai Election Commission ajanga e-EPIC amenokba indang metetdaksüba mapang, e-EPIC ya EPIC dang senrnung PDF version nung lir, koba mobile nunga download sütettsü mesüra computer nunga download sütettsü, ta ashi.

Summary Revision 2021 mapang register asüba elector tasentem aser Enroll nung mobile number alirtemi iba e-EPIC ya January 25 nungi 31, 2021 anogotem nung <https://voterportal.eci.go> & <https://nvsp.in> nungi download sütettsü aser February 1, 2021 nungibo general elector ajungai kasa website nungi download sütettsü, ta ashi.

Iba sentong nung BLO nem sempet agütsü, aser ADC, Dimapur, V. Lovitoly Sema ketdangsüba kübok Voters Pledge agia liasü.

ASTDajangaNFHRCCdangpelar aser maneni ajungshir

Dimapur, Aenjeti/January 25 (TYO): Nagaland Foothills Road Coordination Committee (NFHRCC) ajanga 2013 küm nungi tenzüka küm ter jungnüa tejangraba tulu nung nendaka inyakba ngua, committee nung lenirtemi anir züngsemtem aser iba maparen dak sendakba nung shilem agir ajunga nem parnoki anibelem mesasai inyakba atema tenüngsang agütsür, ta Ao Senso Telongjem Dimapur (ASTD) tir, Meren Longchar aser tongti zülur, P. Sashi Longchar nati sangdong ka nung ashi.


Iba project tulu ya ajanga intra-state highway lenmang yanglutsü ajanget, koba agi state north tsütsü aliba district nungi south tsütsü aliba tashinung Phek, Kiphire, Tuensang aser Noklak district tem dak alaka district ti (8) nungi senzüsempongertem

ajangzüksü. Iba mapa tajung ya tarutsü putuia nüburtemi inyakba mapa tajung ka, ta züngshitsü aser iba atema ASTD ajanga NFHRCC nem tenüngsang agütsür, ta sangdong ajanga ashi.

Iba foothill lenmang yangluba nung ASTD ya maneni NFHRCC den dena lir.

Kasa mapang, NFHRCC dang loktiliba aser rongsenketsüng nung terenlok kadaktsüba lenmang ya yanglutsü atema maneni temolung agütsüdaktsüner. Aser iba maparen dak sendakba nung Government of India, MORTH aser NHAH dang iba foothill road ya National Highway ka ta sangdongdaktsütsü atema jembitsü ajungshir, koba 2020 küm October ita nungi inyaktepa arur, ta kasa sangdong ajangasa ashi.

Aor shisashir mezünpur, I. Wabang süogo



I. Wabang Changkiri

liasü.

Asür I. Wabang ya September 26, 1925 nung aso aser 1940 küm Impur Mission Training School nung school azüng tenzüka aser 1950 küm Government High School, Mokokchung nungi matriculation ajangtet. Fazl Ali College amenekli 1958 küm pa ya mezüng batch (pre-university) nung dena liasü.

Pa ya Lower Primary School, Changki nung assistant teacher ka ama tesayuba wadang 1955 küm tenzüka aser iba sülen 1984 küm Government High School, Ongpangkong nung headmaster ka ama mapa nung küm 29 tenzüker anena liasü.

Iba sülenja pai maneni tesayur inyaksü jangraba ama Children School Mokokchung indang Headmaster inyak aser Jubilee Memorial School, Mokokchung Town nunga administrator cum headmaster inyaka liasü, ta sangdong ajanga ashi.

Iba dak alia, I. Wabang ya Tsüngrem angatetba nisung ka liasü, aser pai arogo balala nung shilem agi aser Mokokchung Town Baptist Church (MTBA) nunga küm 17 tashi deacon inyaka liasü. Ano maneni pa ya ABAM nunga executive züngsem ama inyak, Aongza Fellowship Church nung fellowship in-charge, MTBA aser Hope Centre, Impur indang treasurer aser ano Gideons International, Mokokchung Branch züngsem ka liasü.

I. Wabang den asüpila sentong ya nikongdang 1:30 ako nung agia liasü. Pai par tanur pezü, mezüng semchir 13 aser tanabuba semchir pezü yutsür asü, ta ashi.

Security Forces ajanga Jalukie nung nisung ka apu

Dimapur, Aenjeti/January 25 (TYO): Security Forces temi Police den lungjemer January 22, 2021 nü operation ka agiba mapang Kedime Colony, Jalukie nungi ozüng alema prangbong bena alir nisung ka apu.

Osang tejangja kar nung ajemdaker Security Forces temi police den külemi operation ka agiba mapang nisung ka apu aser pa ket nungi 303 rifle ka, 7.65mm pistol ka,

injang 136 aser 303 rifle indang injang terep 11, point 315 rifle indang injang 10, 12 bore indang injang pongu den kasa prangbong indang injang tamajung ka aser safety fuse feet pezü ngutet.

Iba ken o maneni bushisüngdangtsü atema pua alisang den pa ket nungi ngutetba oset ya Jalukie Police Station nem agütsüogo, ta sangdong ka ajanga ashi.



**DISTRICT ADMINISTRATION &
DISTRICT LEVEL CENTRE FOR WOMEN-
MAHILA SHAKTI KENDRA, MOKOKCHUNG.**



**CELEBRATES
BETI BACHAO BETI PADHAO WEEK
21st-26th January 2021**



**Tetsür aser tebur bendang benria amshiba,
kilong aser kima nung tetsürtem anema
makmanü o jembiba aser tetsürtem jenjang
tekübok nung ayuba anema nokdakdi.**

Assam MLA-i ULFA-I tanishir Paresh Baruah dang temai adoktsü mepishi

Guwahati, January 25 (Agencies): Assam kübok Chabua MLA Binod Hazarika-i ULFA-I commander-in-chief Paresh Baruah dang ozüing alema mapa inyakba anentsü aser temai adoktsü mepishia metetdaksüogo.

"ULFA-I-i Republic Day aser Independence Day mokdangba ya anentsüla. Iba ya ajanga parnoki parnok tashi sayünür" ta Binod Hazarika-i ashi.

"Nübertem tangatetba melenshiogo aser Chabua nung Republic Day aser Independence day benjung amonger" ta paisa ashi.

"Ni ULFA-I commander-in-chief Paresh Baruah dang Assam balaka razüka aotsüba takhangba anendaktsünür aser Centre sorkar den olemtep tenzükdaktsünür. Centre-i olemteptsü molunga lir" ta Binod Hazarika-isa metetdaksü.

January 26 nü Chabua nung Republic Day benjungmong tenüng nung school, college, government office aser panchayat office tem nung linük wako atsükettsü.

"Nübertemi metsübutsüla aser Republic Day amongtsüla. Ozü sorkari kechi tensa ajurudir inyaktsü renema lir" ta Hazarika-isa ashi.

Paresh Baruah'er yimtsüng Jeraigaon nung nübertemi

Republic Day amongtsü sentong renemogo.

"Onoki linük tangatetba nung amanger. Ozü yimtsüng nungi Babul Phukan aser Reboti Phukan nunger ama football asayar aika adokogo aser parnoki national level nung konang bener aruogo. Onoki kümshia Republic Day aser Independence Day amonger" ta Jeraigaon nung lanur Kishor Chetia-i ashi.

Kümshia Jeraigaon Digalibari

nung aliba Bogdung Parishami LP School nung linük wako atsüketer.

"Onoki kümshia Republic Day aser Independence Day nung linük wako atsüketer" ta school principal Dilip Baruah-i ashi.

"Dhemaji bomb apokba sülen nisungtemi benjung amongtsü tsübua liasü saka tangbo school tanurtem aser taintemi benjungmong nung shilem agir" ta paisa metetdaksü.

'Asenok nisungtem' - Republic tangatetba nung, nübertem mangdang aser taginübatem atongtsü atema asen temeyoktep aser linük tulu tejakleni aoer. Tangar dang memetalokba azükaru India ka yangertsü atema India nunger crore 130 külem tashi nung asen linük alizüngtem atema sendaktepa lir.

-Narendra Modi

Iba Republic Day nung Külem Senso ajak dangi salem abener.

Ministry of Information
and Broadcasting
Government of India





TIR YIMYIM YIMOBILEM (EDITORIAL)

DIMAPUR SANGTENNÜ, AENJETI (JANUARY) 26, 2021

KÜ VOTE TO KECHI AKÜM ?

Küm shia India nung Election Comission kümtetba anogo, January 25 ya Vote agütsürtem anogo, National Voters' Day amonger. Aji oda, yashi kasa anogomong ya linük ajaklen " Voter-tem Tashi itshidaktsüba, Saksalemdaktsüba, Kümzüka ayuba aser Meteta kümdaktsüba:" omen nung amendaker sentong tapu balala agia mongogo. Taküm küm iba anogomong among metetmeteta inyakba mapa tasen kaji, joko, tang nungibo asenok voter-tem pei meyong Voter' Identity Card tangari ki tonga bener arutsü matatsüsa digital kumogo. Digital akümba tetezü, voter-temi pei mobile phone number amshia peisasa computer nungi pei Voter ID card agizüka amshitetsü. Iba digital Voter ID Card agizüktsüba ya tamasa voter tasen purtem nem tama maongka agütsür külenang tejenpurtem agütsütsü, anungji voter ajak akujema pei mobile phone number amshia pei meyong Voter ID card agizüktsüba jibo mapang terabo agitsü. Ajisüaka, iba sentong tasenba yagi, taküm küm anogomong omen nung ashiba amaji voter-tem pei vote enoktsü asoshi tashi taitba akümtsü. Atangji, taoba alima aso metsüsuba tashi nung election mapang voter asoshi ID card mamshi aser electronic machine ajanga masü saka kaket (ballot paper) amshia dang pei pei mulungba candidate nem vote agütsü. Aji oda, küm metsü jakdang nungiang election tajungba agitsü asoshi voter nem ID agütsü tenzük aser iba denji tangbo ballot paper masü saka electronic voting machine ajanga dang asenok vote agütsür. Item ajakji vote agütsütsü purtem ajaki pei vote pei enoktettsü nükjidong nung apiteta inyakba mapatem lir. Ajisüaka, nisung tsüngdang kecha inyak majung, pei ajangzüktsü aser pei agitsü atemabo ozünga mali ama inyaktetter. Aji oda, taoba election tashi nungbo nisung kari dang yimkong meyong Voters ID sarudena yur election agiba otsüa aika lir. Anungji, tashimaiter, mekokmeiner aser telok tilabalen adenertembo pei meyong Voter ID card tenük agia mangu aser tedangshia metangshidang election süidaktsüogo. Itemji, pei meyong Voter ID card mangu nungji, tamasayongi polling station-i mao saka parnok vote ajakji parnok melen tangariang parnok Voter ID card bener oa enoktsüba otsü jembir. Iba ama election tim mesüi agibaji Election Commission-ia meteta lir, anungji itemji akok tashi nokdangtsü atema Election Commission-i inyakba mapatem rongnung tang Voter ID card digital akümba ya ka asütsü. Atangji, voter-temi mangatetra, election shia telok ajaki tangatetba agi masü saka tashiyim agidang akoktsü merangtsü, anungji Voter ID digital akümyonga telok tulubai tilaba, kin tulubai tilaba aser prangpong injang aser sen amshirtemi mamshirtem polling station-i vote agütsüia marudaktsütsü. Tanü nübortemiang shimtetter yimsü südaktsüba yimtenren nung, election agiba tetezü aser nükjidong ya nübortem tashi itshidakja yimten nung senso ka ama shilem agitsüsa, pei temeten indang tangatetba agütsür. Aji oda, election nung kodang senso kati pei angatetba nung shilem agia vote enoktsüdir, election temer külen yimten yimsüsürtemi yimsüsüa aodang, pei vote to agi pei lima tajungba kuma melenshir asü memelenshir ? Pei vote agi adokdaktsürtem to agi shisa (idea) tasen bener arua pei nübortem nem mapa agütsütetter asü magütsüteter ? ta pei vote jenjang aiben asadanga shisadanger. Tanü omeni asenok ajak dang bilemdangtsü aser saksalema alitsü ashibaji, election mapang asenoki inyakba aser anguba mapatem indang lir. Atangji, asenok aika atema election ya alima tatembang aru ama bilemer, ashiko, iba jagi pei vote yoka pelateper asütsüa akok. Election arura, kodanga temeim mapa meinyakertem temeim agi sünga akümtsü, kodanga tenla magütsürtemi memeshidangyongi tenla agütsü tenzüktsü, kodanga pei yimtaki moudangertem yimtaki aotsü jangratsü, shinga dena putepa melitettetermi ajak den putepa alitsü merangtsü. Item ajakji tangatetba agi pei mulungjang nungi adokba masü saka election nung akoktsü atema tema tazütsü süoshi sübor tsüngsanga sayurtem lir. Parnokji anogo tenem-roker ka nübortem den alitsü, ajiserbo samadoktsü. Idangji, voter-tem aikati " Kü vote to kechi aküm ?" ta sasatsüa akok. Iba amaji pei vote agi pei mesasatsüsa, asenoki tashiyim agi masü tangatetba agi, senotsü meimba agi masü saka pei lima meimba agi, tanü boksüng angutsü atema masü saka tarutsü putu junga alitsü asosi bilema asenoki election maparen nung ya kanga süoki ia bilema shilem agitsüla. Asenok aikati election nung tashiyim, yi, drugs aser sen amshiba agi election ya temenen sentong aser mapa amato bilemer, anungji shilem magir saka election ya temenen mapa aser sentong masü, Tsüngrem dang asüngdanga shilem agitsüba yimten sentong tongtibangtiba ka lir.

OLEMSABANG

MISSION ASER TANÜ TAMANGERTEM TAMANG TIA JENJANG

~ Rev I.Lanu Jamir

(Yashi adok nungi...)

Nagaland Missions Movement (NMM) nung Staff ka ama kum 15 inyakdang Mungdang aser Arogo aika sema senzuogo. Liangmai Baptist Association NMM Staff-i aiben semdangogo. Mapang ka nung Mungdang Staff den Haraka School lapoka aliba oa semdang. School Staff-i yamai ashi, tanurtem yang nungi matric pass asutsu aser Uttar Pradesh (UP) nung RSS School nung graduate sur arua school nung sayudaktsur ta ashi. Item School tem nung Haraka tamangba aser Hindu na kesa ta tesayuba agutsur. Joko Nagaland nung tanem tanemi School aika Lapoka odaki. Ibaji dang masu angati Training agutsutsu asoshi ki (Building) aika sujia lir. Nagaland Baptist Church Council (NBCC) inyaktsuba lemanji parnok den toktepa School tajung lapoktsuba jiang saka aji tanu tashi meinyakteter.

Temeim Adianutem, Asenoki Nagalandji Khristan teimba aliba linuk ta temulung lema zuzua alir, saka kodasur ajema kumdaktsutsu bendangeri lemanjem ngutetogo. Joko Naga nung raktsutsu (shia aruba ama) bendanger marutsu, saka asen nisung amshia teraksa aludaktsutsu, tamanger ajema kumdaktsutsu asadangtetogo. Asen nepuri bendanger pu kuma (support) jembiba, inyakba, shilem agiba item angudang kutsung (hair) merunga asuktema bilemer. Iba ya meyipa reprangtsu ken bilemtsu menur amai, saka sarasadema tajungba kumdaktsutsu leman bushitsu nungdaker. Tanu zuzua doktsura asungbo Khristan lima ta ashitsu makoktsu. Ano Mission tamakok alutsu aser bendanger pelateptsu. Tetezu parnok sang nung asenok aputsu. Iba ya nokdangtsu aser tim lemanji meyipa anitsu nokdang tem aser Arogo tem den kulemi tamanger ta shiteter ajak tebilemtsu asutsula. Naga nungeri Naga nungertem leman aibelena aniba, masuba telok den atenba, bendanger metenja jembiba, Arogo aser Khristan anema jembiba nungi meyiptsu ajungshiteptsula. Mangsa aser Shiruru tia nung alidang Yisu osang tajung aruba agi tangar mesuka kumdaktsuba mamai iba ya kumzuka yutetra Naga limaji Tsungremi tali merena kumdaktsutsu ta ayimtentu mapang ka lir. Aji mesura mapang tatsuka tsungda nung, Naga lima Tenla kidang kulemertemji - hindu Khristan, limapur Khristan, RSS Khristan Yisu anemer Khristan teimba angutsu.

India ya tenung tasen jatsutsu aser State 8 nung anti-conversion ozung yanglua alibaji State ajak asoshi ta sangdongtsu. Ibaji kodang mapa kumdir Yisu osang Jembir, nashi tepseter, ochi jembir, tebilemba shidanger ajak nation anemer ta ashitsu aser nation anemertemji ayatai asutsu.

Anungji tanu tendak Tsungrem tenzükertem (NBCC, Mungdang, Arogo) anir iba atema khuret kuma meinyakra, tarutsu putu nung Naga nungeri aika bendanger tsungrem sulen anidaktsu aji menua mali. Asen nisungi yimsu ajak kesadang ta India yimtiba Delhi yimdong nung yimyim ayimba asenoki nguogo Khristan rishikangshir suma (support) jembiba video reprangogo. Naga nungeri tanurtem RSS School nung zunger nguogo, ano kuli aika lir. Asen jakdang amang tulu angur. Anungji sarasadem den tesayuba agutsutsu mapangji tang lir. Shinga anema (personal) masu saka tamajungtem anema (against the rulers of darkness) raratsuji Asen Tsungremi mulungba (Ephesia 6:12) aser aji chichia amanger ajak dang nungi Tsungremi akanger.

Tsungremi Iba Ocet Azunger Ajak Nem Tangatetba Agujang ta Sarasademer.....AMEN

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

CalifornianungbombamshiaTenlakiamakbaFBI-i bushisüngdanger



January 25, 2021: Honibarnü (January 23) California nung aliba Arogo Tenla ki ka bomb amshia amakba sülen FBI-i iba tatalokbaji bushisüngdangdar; iba Arogo nungji pastor-i LGBT nisungtem anema jembiba sülen hopta ishika tejaklena iba Tenla ki rongdoktsütsü amokmerena liasü.

El Monte kübok Los Angeles county nung mejangjaba nisung kari Improvised explosive device (IED) bomb ka First Works Baptist Arogo Tenla kidang mereploktsüba ajanga Tenla kidang kichiba raksaa liasü.

Iba tatalokba nung nisung shinga meyiru aser Tenla ki anasa aliba ki 14 den apartment 8 khenpiga atema azüngtetdaksüogo.

Osangbenertem den jembidang El Monte Police Chief, David Reynoso-i, "Tenla kidang Improvised explosive device (IED) ka mereplokja pokdaksü, aser ibaji ajanga Tenla ki tera raksaogo," ta metetdaksü.

Osangbenertem den jembidang Lt. Christopher Cano-i, Tenla ki kichiba nungi mokozü adoka anguba sülen police iba tesemji tonga ao, ta ashi.

Cano-isa, "Tenla ki jara raksa aser kichiba ajak raksa," ta ashi.

FBI otongdar, Laura Eimiller-i, iba ya tesempa agi inyakba asü masüar tang tashi nungbo mejangjar, ta ashi.

Tamalen Pastor, Bruce Mejia-i police dang, social media ajanga iba Arogo Tenla ki rongdoktsütsü amokmerenogo, ta metetdakja liasü.

"LGBTQ group (kasa shi nung medemertem) kari online ajanga ni sayutsüngiba onük züngshi, iba mapang nungjagi parnoki onok amokmerener aser ni El Monte nungi mindoktsü meranger," ta pastor-isa metetdaksü.

Pastor Mejia-i shi nung azüngapongba aser kiyimba onüktem nung sayutsüngiba ashishia aikati iba Arogo anema longkak aita aruogo.

Bomb amshia Tenla ki amakba agi Amongnü iba Arogo Tenla kima Keep El Monte Friendly teloki longkak aittsü aliba sentong thinena liasü.

Keep El Monte Friendly-i sangdong ka ajanga, "Parnoki sayutsüngiba jagi nisungtem jashidaksütsü ta onoki angateta lir, ajisüaka rara adokdaksütsüsabo onoki meinyaktsü. Onoki nüburtem longjemdaksüner," ta metetdaksü.

Honibarnü First Works Baptist Arogoi Lai tekong ana amshia ocet ana lemsatepa liasü. Mezüngbuba Lai tekongji Tenünsang Ken 9:17- "Tsüngrem amadokba kin-a ajak tena tamajungpur molumii aotsü." Tanabuba Lai tekongji Rome 12:19- "Temeimbatem, nenok sasa mang teyang, ajisüaka Tsüngrem ain adokba ataa liang, kechiyong ya zülua lir, Kibubai ashir, mangyangbaji Kü meyong, Ni shia agütsütsü."

Hopta asem tejaklen Keep El Monte Friendly-i online petition ka tenzüka El Monte Mayor Jessica Ancona dang, First Works Baptist Arogo ya tesempa prokba telok ka dang masü saka parnok asen yimti nungi agienang ta mepishia lir.

Tang tashi nung nisung 15,000 dak temai iba petition pusema sign süogo.

2019 küm June ita nung Southern Poverty Law Center (SPLC)-i First Works Baptist Arogo ya California nung tesempa aliba telok 88 rongnung züngsema liasü. Parnoki iba Arogo ya LGBTQ anemertem lir ta metetdakja liasü.

2019 küm nungsa SPLC-i, pastor Mejia-i "Make America Straight Again" conference nung dena liasü aser sorkar dang LGBT züngsemtem tepseta indoktsü mepishia liasü, ta aitsü.

Ketdangsertemi Montagnard nunger dang Khristan yimsü toktsütsü tuyu

January 25, 2021: Vietnam linük nung lisopur Montagnard nunger den Khristan pezü police-i apuba sülen yimdaklirtem lia parnok dang Khristan yimsü tokjang ta tuyua liasü, ta International Christian Concern osang ajanga metetdaksü.

January 15, 2021 nü Radio Free Asia's Vietnamese service den jembidang Rô Da-i, Ea Lam yim aser Song Hinh district (Phu Yen province) nung aliba police-i pa den nisung pezü Pung tribal yimdaki anir aoba sülen yimdaklirtem adenshia lia parnok dang Khristan yimsü tokang ta tuyua liasü, ta metetdaksü.

Ketdangser 20-i yimdaklirtem dang, nisung troki Khristan yimsü toktsüba kuli süa reprangtsü atema nenok adenshiang ta metetdaksü. Ketdangsertemi Khristan trok anema inyaktsü tebilemba liasü saka nisung kabo anir marutet. Par ponguji (Messrs Nay Y Blang, Nay Y L?i, Ksor Y Blang, Hwing Y Nuk aser Rô Da nunger) Montagnard Evangelical Church of Christ nung züngsemtem lir.

Iba sentong agiba sülen parnok kidangi aotsü atema temelaba agütsü saka maneni parnok amokmeren.

Arogo nung staff ka, Y Krek Bya-i, "Par pongui Arogo toktsütsü memelung, parnok asütsüsa süaka parnoki Arogo metoktsütsü. Ketdangsertemi parnok dang, nenoki Arogo metoktsüra nenok anema longkak aittsü, onoki nenok jail nung puoktsü aser temerenshi tulu agütsütsü, mesüra tepsettsüa akok ta amokmerena liasü," ta metetdaksü.

Ro Da-isa, "Ketdangsertemi iba Arogo magizükteter. Parnoki onok madenshidaksür, sentong magidaksür aser kententsü memelar. Parnoki ajak nokdangogo. Kü melungjang nung tetsübu lir, ajisüaka ni Khrista dak tamang akar," ta ashi.

ANOGO ABEN TSÜNGREM DEN

Nenok alima tesangwa Mathi 5:13

Tsüngremer nüburi alima asoshi teraksa aser temenen samaja aliba lima ka wazüka ayur tongti lir. Ne takümüji kechi tajung aser temeden lir aji wazüka ayutsü asoshi Tsüngremi yanglu aser telok nung yutsü. Tanü temeshi nisung ka lokti nung tensembaji kanga tongtipang lir. Khrista ne dak aliba tangar asoshi Pa akaba ajak kaa kümdaktsür. Pa tekümtet jagi mozü lar nüji kümdaktsütsü akok, kibong teraksa medenteptsür, tesüiba zübu anebtsür, lemanng tai nung nemzüa alir anir arur aser jashia alir mulungjang süneptsür. Na ajanga Khrista sayudang na meketa alirtem nem item ajak agütsür.

Kibuba den asenok tesendaktep raksatokra, Yisui ashir, asenok metsü dak tanang samadokba ama alitsü aser tagidak maka akümtsü. Tsüngremer tekümsükba taochi kecha tangar nem asenok ajanga agütsütsü makok. Asenok dak metsü aliba asenoki koda tendangtsü? Ner kibong reprangang. Asenoki aji tamajungba nungi wazüka yua lir ma? Asenok mapa inyakdak tentangang. Asenoki idakji aliba agi temenen mapa meinyaki lir ma?

Asenok lokti reprangang. Asenok idakji aliba agi aji tajungba meta kümdar ma? Arogo koda? Asenok Tsüngremi amshiba ajanga aji tajungba kümdar ma? Asenok meketa aliba nübur tanela tashi meti kümra, asenoki Tsüngrem dangi oa parnok wazüka ayutsü atema asen taküm yanglushijang ta Tsüngrem dang asüngdangtsüla.

Vietnam nung Pastoral Centre ka semzük

January 25, 2021: Northern Vietnam nung akhidang aliba jenjang ajungkettsütsü aser Arogo ka nung pastoral center pastoral mapatem inyaka tasen ka semzükogo; Ninh Binh Tsüngrem temeim kuli asütsü province nung Nha Chung aser tangar dang Khristan pastoral center semzükba yimyatsüya tajungtem sayutsü, sentong nungji nisung 5,000 dak ta ashi.

Küm 100 tejakdang iba January 21, 2021 nü Ho Chi Arogo kiojentem yanglua liasü, Minh City nung aliba Phat Diem anungji ki kanga tejen akümba Diocese nung temaba putir, dang masü saka nüngdakba Joseph Nguyen Nang den mapang nung mamshiteti liasü. tanga putir 10-i iba center Pezüben tashi amentepa meshiteta liasü. yangluba center nung Tenla ki Iba sentong nung jembidang tilaka, multi-purpose hall aika temaba putir, Joseph Nguyen-i, aser retreat agidang amshitsü, amangbapurtem aser formation courses den putirtem putirtemi amalitepa inyakba, nüngdak balala mapang nung sarasademba aser tenla tajung amshitsü atema takdang temeja agütsüba agi iba center takok 195 lir.

ngua yanglutetogo, ta ashi. Tesüiba küm ishika tsüngda

Paisa, iba center ya dong Vietnam nung sorkari sen 3,000 ajanga yanglu ta tamangba yimsü balala anema ashtsü akok, kechiyong tesüiba tenokdangbatem tera küm ana tashi iba center salatsüogo. Tang northern yanglutsü atema kibong Vietnam nung aliba Arogo aika 30,000-i anogo shia dong sen nung facilities tajung lir, aser 3,000 tenla agüja aruogo, ta Arogo aikati 1954 küm metetdaksü. communist sorkar

Paisa, iba center semzükba matsüngdang reshikangshi ya putiotsü akümtsüsa lir; iba ajanga timtembapurtem yarir.

OLONG PAITEP # 5705

1						2				3
								4		
5		6				7				
8										9
								10		
				11		12				
		13								
14						15				
			16							

TIPIEN

1. O jembitsü tashi - 8
 5. Sängjang tapu ka - 5
 7. Tekanük nung enokba - 5
 8. Teka amtep - 5
 12. Tzük asendak - 5
 14. Tsüngpang tema aliba - 5
 15. Ken atenba yimya - 5
 16. Asangur - 8

LANGTSÜNGLEN


1. Tepok telung nung shilem ka - 7
 2. Tamajung aküm - 5
 3. Chi den külemi achiba - 3
 4. Meimchir alimai aruba - 3
 6. Laishiba nung ayong ka - 4
 9. Tarutsü nükla - 7
 10. Tamendakdak/Nükjidong - 4
 11. Tenük-telen mejungi aküm - 5
 13. Terok nungi adokba - 3
 14. Meimchir telemsa - 3

OLONG PAITEP # 5704 TELANGZÜBA**TIPIEN :**

1. Taa, 3. Teküm, 6. Aibelen, 7. Aut,
 9. Ajizük, 10. Ojala, 11. Semer,
 13. Sen, 15. Kioktsü, 17. Itsük, 18. Kar.

LANGTSÜNGLEN :

1. Tai, 2. Asensor, 3. Tanü, 4. Kua,
 5. Mitsütsü, 6. Azübenshi, 8. Lah,
 9. Jangkok, 12. Akok, 14. Nashi, 16. Sür.

**TESAYURI ALOKBA DANG ALGEBRA SAYUR :**

Tesayur : Iba ya Mr. Alokba i langzüang- A=B, aser B=C, tetezü A=C ta khuli sayur, süra iba mesükba tatishitsü ka shiang.

Alokba : Very simple sir, ni na meimer, nai nü jala meimer, tetezü ni nür jala meimer ta ati!

Tesayur : Oh Alokba!!

Lilir : WhatsApp

TANÜBO NAI LANGZÜANG

Q. Koba küm G7 tenzük?

A.1970

B.1973

C.1975

D.1977

===== (Taruba adok nung onoki langzütsü)

YASHI ADOK TELANGZÜBA : 1996

Happy Birthday

TEENÜNG

: WAITSUNGLA AIER

Tasoba anogo

: 26 JANUARY

Küm

: 6

Class

: 1

School

: ST. MARY'S HR. SEC. SCHOOL

PADUM PUKHURE

Talidak

: EKRANI PATHAR DIMAPUR

Tsüngremi Jala taküm küm terok (6) tashi len ania aruba asoshi Tsüngrem tenüng asanger. Tsüngremi ano Jala arishi talang moajang ta sarasatemsür

- Temeim Avo, Aba aser Kinungertem.

**NAI-A YA METETTER MA?**

March 4, 2020 nü Solihull, United Kingdom nung Sport nutrition aser fitness brand -Grenade®-i protein bar tulutiba sayaogo. Grenade indang Carb Killa® Chocolate chip Cookie Dough protein bar tuozük seret 239 lir (526 lb.9 oz) aser iba bar yagi otsü tasen ka yanglua Guinness World record ajangzüktet. Iba protein bar yanglur sülen, bar ya tilala sangsar Grenade® customer, partner aser ambassador ajak dangi 'Carb Killa® Birthday' box nung inoker yokogo.

SUDOKU # 5746**TELANGZUBA # 5745**

7	1	3	9	2				1	2	4	6	8	5	9	3	7
	9		1		4	8	3	2	7	6	5	3	1	9	8	2
	8				3				8	9	3	7	4	2	5	1
		9	7			1		5	5	8	1	4	3	6	2	7
	3	2	5		6			7	2	3	7	5	9	1	6	4
			4		1		8	3	9	4	6	2	7	8	1	5
3			2	1	5		7	9	4	1	9	8	2	3	7	6
	2	5			7	3		6	3	5	8	1	6	7	4	9
	7		3	6					6	7	2	9	5	4	3	8

OJANG LUTEP # 5293

ARTAK	:				
KOTERO	:				
ATKI	:				
NSAKSEER	:				
NDAG	:				
NGPEIA	:				
GBKOROTONA	:				
ERAS	:				
TEMTIMBA	:				
YUSATET	:				

OJANG LUTEP TELANGZÜBA # 5292

**NÜBUR KAR MEDENRA NÜTSÜNG AIKA ADENSHIYONGA LOKTI
 SENDEN MERA MAKETER**

TAN HOPTA ATEMA - KOMA SÜLA ?

Q. Nagaland nung ya Assembly constituency 40 dang aküm nunga süla ?

Olong 29 shi nung January 22, 2021 tashi nung iba telangzüba ya onok dangi (e-mail - tiryimiyim@gmail.com) :
 (SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzübatemji taruba Honibarnü adoktsütsü.



Ghaziabad, January 25, 2021: Hombarnü Delhi-Ghaziabad arrtsü nung aluyimertemi Republic Day nü tractor rally agitsü atema renemshiba noksa nung angur.

Tractor rally ya linük aser sepaitem nüngtem nung agitsü: Rakesh Tikait

New Delhi, Aenjeti/January 25 (Agencies): Hombarnü Bharatiya Kisan Union (BKU) lenir, Rakesh Tikait-i, January 26, 2021 nü Republic Day anogomong nung New Delhi nung aluyimertemi 'kisan parade' nung shilem agitsü aser tractor rally ji Delhi Police den senden amendang bangjemba ama agitsü, ta metetdaksü.

BKU national otongdar, Rakesh-isa, "Linük yimtiba nung tractor rally ji anüngdang 11:00 ako nungi agitsü. Tractor

ji lane ana nung senzütsü aser NH- 24 Akshardham-Anand Vihar nungi agitsü," ta metetdaksü.

Tractor rally agitsü atema volunteers renema lir, asüng (January 26) rally ya sepaitem aser linük nüngtem nung agitsü, ta paisa metetdaksü.

Honibarnü Rakesh Tikait-i, Uttar Pradesh aser Uttarakhand na nungi tractor 25,000-i 'Kisan parade' nung shilem agitsü imlar, ta metetdakja liasü.

Coronavirus wara anema

tenokdangbatem aliba aser curfew ozüng aliba nung ajemdaker District administration balalai aluyimertem dang tractor rally nung shilem magitsü metetdakja arudar, ta paisa ashi.

Honibarnü aluyimer unions aser Delhi police na senden amenba sülen aluyimertem lenir, Abhimanyu Kohar-i, January 26 nü tractor rally agitsü atema Delhi police-i aluyimertem nem temelaba agütsüogo, ta metetdakja liasü.

Balakot amaksü osang Arnab nem metetdaksüsangji PM lir: Rahul

New Delhi, January 25 (Agencies): Ato kilonser, Narendra Modi aija Congress lenir, Rahul Gandhi-i, Balakot amaksü atema asalentong yanglua aliba miim sentong Republic TV editor-in-chief, Arnab Goswami nem metetdaksübaji Modi tai ajanga lir, ta aitsü.

Hombarnü Tamil Nadu kübok Karur district nung taruba assembly election atema nüboyimba sentong nung Congress MP, Rahul-i, Balakot amaksü miim sentongji Ato kilonser aser Defence Minister na densema nisung pongui dang meteta liasü, ta ashi.

"Balakot amaksü atema miim sentongji journalist kati (Arnab) meteta liasü, ta anogo ishika tejaklen asenoki metetogo. (Indian) Air Force-i bomb amshia Pakistan amaksü

anogo asem jelia India nunger journalist ka dang iba sentongji metetdakja liasü. Iba tetezü asen IAF pilot tem lendong ajurutsüsa liasü," ta Congress leniri ashi.

"Balakot (air strikes) amaksü sentongji alima nung nisung pongui dang meteta liasü. Ato kilonser, Defence minister, National Security Adviser aser Chief of the Air Force aser Home minister nungeri dang meteta liasü," ta pai ashi.

"Balakot mamakdangbo shingai iba indangji memeteti liasü. Ni ya metetner- Balakot amaksü atema jelia shibai journalist nem iba osang metetdaksü? ta kechiba bushisüngdang masür. Kechiyong parnok pongu rongnungi kati iba nisungba (Arnab) nem osang metetdaksü. Parnok pongu

rongnung nisung kati Air Force ashioktsü," ta paisa aitsü.

"Ato kilonseri metetdaksü masü nungbo kechiba pai bushisüngdangtsü atema tetuyuba magütsür. Ibaji shisadangang. Ato kilonseri bushisüngdangtsü atema metuyuba tetezü journalist nem iba osang metetdaksüsangji pa (Modi) lir," ta Rahul Gandhi-i ashi.

Rahul Gandhi-isa, "Tanübo China nunger sepaitem India nunger litsü nung mena lir. Ato kilonseri pa teku tasazük inch 56 ta jembir. Tanübo China sepaitem India nunger litsü telung nung mena lir. China nungeri India nunger litsü kilometer meyirjang aika agiogo," ta ashi.

Rahul-i, tesüiba ita 3-4 tsüngda o jembidang Modi-i 'China' ta meshiteter, kechiyong pa tasümaait, ta aitsü.



Jaipur, January 25, 2021: Hombarnü Jaipur nung Republic Day amongtsü anogo ka jelia feet 100 talang India wako bener senzüba noksa nung angur. State Minister Subhash Garg-i Rajasthan University nung flag march ji tenzüksü aser Amar Jawan Jyoti nung tembanga liasü.

TRP ratings atema Arnab Goswami-i kü nem sen agütsü: Partho Dasgupta

New Delhi, January 25 (Agencies): Taoba mapang Broadcast Audience Research Council (BARC) CEO, Partho Dasgupta-i tezüuba nung Mumbai Police dang, TRP rating ajungtsü atema Republic TV Editor-in-Chief, Arnab Goswami-i par kibong bendangleni aodang pa nem US sen 12,000 agütsü aser küm asem tsüngda sen lakh 40 agütsü, ta metetdaksüogo.

TRP ochimashi ken o nung January 11 nü Mumbai Police-i supplementary chargesheet tapak 3,600 benoka lir; iba nungji BARC forensic audit report ka, Dasgupta aser Goswami na tsüngda WhatsApp chat asüba aser nisung 59-i kuli agütsüba densema lir.

Audit report nungji Republic TV aser Times Now na densema TV channels aika tetshia lir aser TV ratings jungdaksütsü atema BARC nung tongti executives-i ochimashi inyakba densema lir.

Supplementary chargesheet ji Dasgupta, taoba mapang BARC COO, Romil Ramgarhia aser Republic Media Network CEO, Vikas Khanchandani nunger anema benok. Mezüngbuba chargesheet ji 2020 küm November ita nung nisung 20 anema benoka liasü.

Yaküm December 27 nü

Crime Intelligence Unit office nung Dasgupta dang asüngdangyaba mapang nung Dasgupta-i, "Ni 2004 küm nungi Arnab Goswami meteta liasü. Küna Times Now nunga külemi inyakogo. 2013 küm ni BARC nung CEO ama join asü. 2017 küm Arnab Goswami-i Republic TV tenzü. Republic TV metenzükdanga pai pa sentong lemsatepa liasü aser pa indang channel rating ajungtsü atema pa yaritsü mepishia liasü," ta nangzüka liasü.

"Republic TV rating number 1 akümtsü atema ni ozü team den TRP ratings inyakyim nung ochimashi inyak. Ibaji 2017 nungi 2019 küm tashi inyaker lila. 2017 küm Arnab Goswami-i St Regis hotel, Lower Parel nung ni ajuru aser ozü kibong France aser Switzerland-i aotsü atema kü nem US sen 6,000 agüja liasü. 2019 küm nunga Arnab Goswami-i ni St Regis nung ajurua ozü kibong Sweden aser Denmark-i aotsü atema kü nem US sen 6,000 agütsü. 2017 küm nungsa Goswami-i ni ITC Parel hotel nung ajurua kü nem sen lakh 20 agütsü... 2018 aser 2019 nunga Goswami-i ni ITC hotel Parel nung ajurua kü nem anaben tashi sen lakh 10 agütsü," ta paisa nangzüka liasü.



Karur, January 25, 2021: Hombarnü Tamil Nadu kübok Karur district nung taruba assembly election atema nüboyimba sentong ka nung Congress party lenir, Rahul Gandhi-i tetsür chanu ka pa nokdakba gari nung atsüketba noksa nung angur.

EC-i digital voter ID cards agütsü tenzüko

New Delhi, Aenjeti/January 25 (Agencies): Hombarnü National Voters' Day anogomong nung Election Commission-i digital voters' photo identity card agütsü tenzüko, ta ketdangsertem osang ka ajanga metetdaksü.

Digital voter ID cards mesüra e-EPIC (Elector Photo Identity Cards) ta ajaba e-voter card ya PDF format nung angutsü aser 'edit' süshitsü makoktsü; nüngdakba mapang nung voters-i peisasa ibaji print süa laminate asütsü akok.

ID card ji mobile phones nung store süa ayutsü akok aser computer nung download asütsü akok; iba dak alia digital locker ama facilities nung ayutsü akok.

Assembly election agitsü aliba state tem- West Bengal, Tamil Nadu, Assam, Kerala aser UT- Puducherry nung polling anogotem nung e-voter

card ji amshitetsü. Item states aser Union Territory nung assembly election taküm April-May nung agitsü.

Ajisüaka 'PV' physical voter card-a maneni amshitetsü.

Special summary revision 2021 mapang register asüba voter tasenpurtem, November-December 2020 ita nung apply süa mobile number agütsürtemi SMS ka angutsü aser parnoki January 25 nungi January 31, 2021 tashi nung e-EPIC download sütettsü.

General voters-ia e-Roll nung unique mobile number lira February 1 nungi e-EPIC download sütettsü. E-EPIC download masüdang parnoki (KYC) process inyaksüsa akümtsü.

EPIC card samar alirtem mesüra raksar alir voters-i duplicate cards angati download sütettsü. Tang iba facility atema sen 25 agütsür.



China anüdoklen Shandong Province kübok Qixia City nung hon atoba tesem apokdak January 25, 2021 nü ketdangsürtem mapa inyakba noksa nung angur. Iba lendong atalokba tesem nungi ketdangsürtemi nisung tasümang 10 agitetogo. Yantai yimti kübok Qixia nung January 10 nü hon atoba tesem apokdak hon ator nisung 22 ali telung nung nembanga liasü. Hopta ana ali telung nung lir nisung 11 Deobarnü kumzüka liasü, aser ano ka samar bushir, ta Hombarnü sangdong ka ajanga ashi.

Pakistan Taliban 'commander' tem tepset: Pakistan army

Islamabad, Aenjeti/January 25 (Agencies): Pakistan mitkartemi northwestern North Waziristan district nung security operation ana agiba mapang Pakistan Taliban telok nungi lenir ana densema züngsem pongu tepset, ta ashi.

Deobarnü menur osang ka sangdongba nung mitkartemi ashiba agi, parnoki iba district kübok Mir Ali aser Kaisoor tesemtem nung security operation agi, koba mapang ka Tehreek-e-Taliban Pakistan (TTP mesüra Pakistan Taliban) indang headquarter liasü.

"Iba IBOs mapang kiralongrar lenir, TTP (AKK Group) telok nungi Syed Raheem [shiba dang] Abid ta ajar aser TTP (Gohar Group) nungi Saifullah Noor na densema kiralongrar pongu tepset, ta sangdong ajanga ashi.

Sangdong ajangasa ashiba agi, 2007 küm nungi tenzüka Pakistan security forces dak 17 ben lendong agütsüba nung Raheem ya shilem agia liasü aser tawa district nung tenük yoker nisung tepsetba nunga dena liasü.

Taoba küm nungi tenzüka nisung 50 dak tema prangbong aser improvised explosive device (IED) amshia North Waziristan nung tepsetogo, ta osangtem ajanga ashir.

"Tenüng teta tepsettsü, kiralongrar tasen shima tentettsü atema tsükchir agency ajanga Raheem nem mapa lezmükja liasü," ta Pakistani military sangdong ka ajanga ashi.

"Mir Ali tesem nung tribal lenir pezü tepsetba, North Waziristan nung aliba company ka nung inyaker engineer asem

tepsetba aser IEDs lendong aika nung pa dena liasü."

Mir Ali aser anasa aliba South Waziristan district kübok Wana region nunga Raheem-i suicide bomber training centre ana lapoka lir, ta ashir.

Khaisoor nung aliba Security Forces dak IED amshia lendong balala agütsüba nung Noor-i shilem tejangja agia liasü, ta ashir.

Pakistan mitkartemi 2014 küm North Waziristan aser iba den metenloka aliba district tem nung military operation tesashi ka tenzüker aser yangji kanga sashia amenteta aliba TTP züngsemtem kidanger linük, Afghanistan leni jena ao.

2017 küm nungi azüdokshi aser lendong tulu atalokba kanga ajema kumogo, saka TTP temi mapang shia civilian ser security forces dak amakba ajurur.

India nungi COVID-19 mozü Bangladesh tonga aruogo

Dhaka, Aenjeti/January 25 (Agencies): New Delhi-i Dhaka nem COVID-19 mozü doses million ana sempet ama agütsür anogo pezü lir procurement agreement ka kübok India nungi Covishield mozü doses million 5 indang consignment mezügbuba Hombarnü Bangladesh tongogo.

Serum Institute of India den külemi yangluba Oxford-AstraZeneca COVID-19 mozü abenba Air India tayimtsü ka anepdang Hazrat Shahjalal International Airport tonga aru, koba linük tesem ajunga nung alemtsü lia nija Beximco Pharmaceuticals Ltd indang warehouse ka nung yua atatsü.

Telok asem tsüngta tenangzüktep ka agiba kübok Beximco pharmaceuticals ajanga Serum Institute of India nungi Bangladesh-i mozü ya doses million 30 alia lir. Mozü

ya linük yimtiba, Dhaka tezülen Tongi tesem nung aliba Beximco warehouse temi freezer van tem nung bener ao, ta Beximco Pharma indang managing director Nazmul Hassan-i airport nung osangbener dang ashi.

Sorkar nung mongin temi iba mozü sample tem agizüka temperature melenshiba agi mozü raksa meraksa tendangtsü, ta health ketdangsürtemi ashi.

"Drug Administration nungi kuli kaket anguba sülen Beximco Pharma ajanga mozü ya administrative district 64 prong nung aliba civil surgeons dangi yoktsü," ta health ministry sangdong ka ajanga ashi. Bangladesh-i taruba ita tem nunga ita shia mozü ya India nungi lakh 50 angutsü imlar, ta Health minister Zahid Maleque-i shia liasü.

Bangladesh nung linük

ajungalen COVID-19 mozü ya February ita tetenzüklen nungi alem tenzüksü. Ketdangsürtemi distribution team 7,344 tentetogo aser team health worker trok lir, aser health worker 42,000 shi training agiogo, ta ketdangsürtemi ashi. Tang tashinung Bangladesh nung nisung 532,000 dak tema coronavirus tashidak agi menepba osang lir, aser nisung 8,000 dak tema süogo.

Alima nung India ya mozü timtiba yangluba linük lir aser coronavirus mozü alitsü atema linük aikati asüngdangogo. Tesüiba anogo ishika tsüngta India-i iba mozü ya Bhutan, Maldives, Nepal, Bangladesh, Myanmar, Mauritius aser Seychelles linüktem nem agüja lir. Ano maneni Saudi Arabia, South Africa, Brazil aser Morocco linüktem dang ayoktsü mera agiba mapang lir.

NCP-i PM KP Sharma Oli party nungi mintok

Katmandu, Aenjeti/January 25 (Agencies): Nepal Communist Party yongtsü nung Prachanda-i aniba teloki linük Ato Kilonser KP Sharma Oli party nungi mintokogo.

"Pa membership agintsüogo," ta Prachanda'er telok otongdar Narayan Kaji Shrestha-i ANI nem osang agütsü. Source balala ajanga News18 dang ashiba agi, Oli-i Communist Party of Nepal (Unified Marxist-Leninist) asüngsashitsü akok.

December ita tetenzüklen iba telok yagi ruling party nung co-chair arishi küm 68 tain Oli agin. Iba sülen party tanabuba chairmen asütsü Madhav Nepal shima liasü. Party nung Prachanda ya mezügbuba chairmen lir.

Osang ajanga ashiba agi, Oli aser Prachanda-Nepal napronglai NCP ya parnok

meyong ta ashiba Election Commission-i magizük.

Prachand den tashi toktepa aliba mapang ka nung December 20 nü China den sendaktepa alisang Oli-i züngsem 275 agi kümteba House atongsatsüba sülen Nepal nung mepet mesü adok tenzüker.

Ato Kilonser tetuyuba nung tir Bidya Devi Bhandari-i house atongsatsü aser April 30 aser May 10 nü election agishitsü atema sangdong. Iba sülen NCP yongtsü nung Prachanda-i aniba teloki iba telemteba anema nokdaka liasü.

2017 general election akokba sülen Oli-i aniba CPN-UML aser Prachanda-i aniba NCP (Maoist Centre) na 2018 küm May ita longjemer Nepal Communist Party tentet, ajisüaka tang telok ana tsüngda mepetmesü adoka lir.

South China tzüym-i U.S. Military yokba ya yimjung atema tetsükdaktsü: China

Beijing, Aenjeti/January 25 (Agencies): United States-i mapang shia South China tzüym-i rong aser tatimtsütem yoker aser iba ya yimjung atema tetsükdaktsü lir, ta China Foreign Ministry-i Hombarnü ashi. Mangatettep adoker aliba tzüym-i U.S. aircraft carrier telok ka yokba sülen China-i oba olen lemsatsep.

South China tzüym koba ajanga küm shia dollar trillion aika shishilembar, iba tzüym ya Beijing aser Washington napronglai azüokner aser US military inyakyim ajanga talisa China mepelar.

USS Theodore Roosevelt-i anir US nunger indang warships asem Honibarnü tzüym nung kecha tenokdangba makai inyaksangshitsü ajungkettsü atema iba tesemi ao, ta U.S. military-i ashi.

"United States-i mapangshia tayimtsü aser rongtem South China tzüym-i yoker," ta foreign ministry otongdar, Zhao Lijian-i, US nunger inyakyim indang asüngdangba mapang osangbenertem dang ashi.

"Iba inyakyim ya iba tesem nung yimjung aser tesunep atema majung," ta Zhao-i ashi.

South China tzüym nung China-i atsünger aliba asetkong anasa US nunger Navy rongtem

yokba China-i ashishia arudar. Iba asetkong ya Vietnam, Malaysia, Philippines, Brunei aser Taiwan nunger ajaki parnok meyong ta ashir.

Taiwan-i linük anüolentip len defence identification zone adena China-i ajungbena jets tem yokba indang metetdaktsüli US indang rongtem iba tesemi ai.

China nunger air force kechi atema iba tesemi ai, iba indang Zhao-i telangzüba magütsü.

Ajisüaka pai, Taiwan ya China nung shilem ka aser United States-i "one China" principle sülen anidaktsüla, ta ashi.

Taiwan tir Tsai Ing-wen-i Hombarnü asetkong anüdoktiplen radar base ka semdangogo aser Chinese force tem inyaksangshi potettsüsa inyaksangshitetba atema tenügsang agütsü, ta lar office sangdong ka ajanga metetdaktsü.

"Taoba küm nungi asenok indang radar station yagi communist tayimtsü 2,000 aser communist rong 400 dak tema potetogo aser iba ajanga tekaraba nung jenjang agia parnok mintokba nung teyari agütsüba den tzüym aser anüng tajungba meita atateter," ta lai ketdangsürtem dang ashi.



Kabul, Aenjeti/Jan. 25 : Kandahar province, Afghanistan kübok Zhari district nung January 25, 2021 nü military operation ka agiba mapang mitkar ka prangbong amer aliba noksa nung angur. Southern Kandahar province nung Taliban züngsem 38 tepsetba sülen yangji item telok tashi ajema kumogo.

DEBTS RECOVERY TRIBUNAL ,GUWAHATI

Government of India, Ministry of Finance
Department of Financial Services(Banking Division)
Suwarna Bhawan, House No.12, New Town Path, Near Hanuman Mandir, G.S.Road,
Ulubari, Guwahati-781007.

NOTICE OF DEMAND TO THE CERTIFICATE DEBTOR(S)

(See Sections 25 to Section 29 of the Recovery of Debts Due to Banks and Financial Institutions Act, 1993 and under Rule 2 of Second Schedule of the Income Tax Act, 1961)

RC.No.52/2019

UCO Bank, Dimapur Branch-Vs- M/S M & D Provision Store & Ors.

To

1. MESSERS M& D PROVISION STORE, 152 ½ MILE DAROGAPATHAR, DIMAPUR, NAGALAND-797112
2. SRISUSHILKUMAR GUPTA HOUSE NO 15 TWO AND HALF MILE DAROGAPATHAR, DIMAPUR, NAGALAND-797112
3. SRIVINODKUMAR GUPTA, CARE OF SUMMIT HOTEL SHOP NO 410 MURGIPATTI, DIMAPUR, NAGALAND-797112.

This is to certify that a sum of Rs. 32,19,401.09/- (Rupees Thirty Two Lakhs Nineteen Thousand Four Hundred One and Paise Nine only) as per details given below has become due from you consequent to a Recovery Certificate issued by the Ld. Presiding Officer by an order dated 11.07.2019 in case O.A/No.59/2019.

1.	Amount due as per the Recovery Certificate:	Rs. 15,03,721.09
2.	Interest from 22.02.2019 to 31.12.2019 @11.50% P.A.	Rs. 16,56,920.00
3.	Costs	Rs. 58760.00
	Total	Rs. 32,19,401.09

You are hereby directed to pay the above sum within 15 days from the publication of this notice failing which the recovery shall be made in accordance with the provisions of Sections 25 to Section 29 of the Recovery of Debts to Banks and Financial Institutions Act, 1993 and under Rule 2 of Second Schedule of the Income Tax Act, 1961.

In additions to the sums aforesaid, you will be also liable for

- (a) Such interest as is payable in accordance with the recovery certificate (RC No. 52/2019) for the period commencing immediately after issue of recovery certificate to the date of realization, and
- (b) All costs, charges and expenses incurred in respect of the services of notices and of warrants and other processes and proceedings taken for realization of the dues.

GIVEN UNDER MY HAND AND SEAL ON 6TH DAY OF JANUARY, 2021.

(S.KUMAR)
RECOVERY OFFICER
DEBTS RECOVERY TRIBUNAL
GUWAHATI.

MULUNG NEN O

Onoki teti meiem aliba asür **SENTIYANGER** (CHANGKI), shirang yipden nung aliba mapang nungi asüba anogo tashi kija, kiyonger aser lokti balala shirnokisa tamang sarasadem den shisatsü, nübu aser rongsen agi yariogo, nenok ajak dang kanga pelar.

Teyanglur Tsüngremi nenok ajak moajangma.

Temeim Tsürabur, adianu aser kinungertem



**ASO : 6/11/1976
ASÜ : 11/01/2021**

MOLUNG NEN O

ASÜBA ANOGO 14-01-2021

Ozü mulungjang nung teti meima aliba asür **T.IMKONGMAR AIER** shiranga hospital nung aliba mapang aser pa alima nungi pila or mangyim jashi mapang kwinakati tensa mejungaka pei akokba yari sarasadem, nebu aser rongsen ajanga ozü mangyim lemsatepogo, nenok ajak dang kanga pelar. Talisa Faith Hospital nung Doctortem aser Nursetem, arogo palala, yimden yimsüsürtem, kiyong kidanger, ana aser talang nungi temeimertem arua yariteper ajak dang kanga pelar.

Ozü mulungjang taroktiba nungi Tsüngremi nenok ajak maneni moajang ta sarsademtsür.

Temeim kinungtsü, jabaso aser kinungertem.

Mokokchung nung National Voters' Day mungogo

Mokokchung, Aenjeti/January 25, 2021: Hombarnü, Mokokchung nung 11buba National Voters' Day sentong agiba mapang, DC & DEO Mokokchung, Limawabang Jamir aser ketdangsürtem den vote agütsütsü tang mezüng tenüng zülüokertem külemi tangokba noksa ka yangi angur.

Mokokchung, Aenjeti/January 25, 2021 (TYO): Hombarnü (25.01.2021) ADC Planning Conference Hall, Mokokchung nung "Making our Voters Empowered Vigilant, Safe and Informed" omen kübok 11buba National Voters' Day sentong agiogo. Iba sentong nung Limawabang Jamir, Deputy Commissioner & District Election Officer Mokokchung, alakteta tejaoker ama aruagi aden, ta sangdong

ka ajanga metetdaksü.

Sentong nung jembiba mapang, DC-i Vote agütsütsü atema tang mezüng züngoksema alirtem pelashishia agizük aser sen ajanzüktsü mechi pei vote mayoktsü asoshi parnok ajungshi. Electoral inyakim tsütsü shilem tulu agia aser anibelem arema inyakba asoshi DC-i district nung Both Level Officers (BLO) ajak dang pelaba metetdaksü.

Iba sentong nung BLOs tajungtiba nem award agütsüogo.

DC-isa vote agütsütsü atema tang mezüng züngoksema alirtem nem tenügsang agütsü aser pai 'voters pledge' ketdangsüa agi.

Iba sentong nung Sentilong Ozukum EAC Hq menden liasü aser Dharam Raj IAS SDO (C) Mokokchung-i telok pela agizük. Zerutso Kesiezie EAC Hq-i tepela anküp o jembu.

51buba IFFI: Into the Darkness-i Golden Peacock Award angu

Goa, Aenjeti/January 25, 2021 (Agencies): Deobarnü (24.01.2021) Panaji, Goa nung 51buba International Film Festival of India (IFFI) sentong takok ngua agiogo. Iba sentong nung Danish indang World War II drama - Into the Darkness-i Golden Peacock Award aser Tzu-Chuan Liu o Zofia Stafiej nati temaba award angu.

51buba IFFI nung takok angurtem:

- * Golden Peacock Award - Into the Darkness
- * Silver Peacock Award for Best Actor - Male - Tzu-Chuan Liu, The Silent Forest
- * Silver Peacock Award for Best Actor - Female - Zofia Stafiej, I Never Cry
- * Silver Peacock Award for Best Director - Chen-Nien Ko, The Silent Forest
- * Best Debut Director Award - Cássio Pereira dos Santos, Valentina
- * Special Mention Award - Kripal Kalita, Bridge
- * Special Jury Award - Kamin Kalev, February
- * ICFT UNESCO Gandhi Award - Ameen Nayfeh's 200 Meters
- * Indian Personality of the Year Award - Biswajit Chatterjee

NE nungi tanur 4 nem 'Pradhan Mantri Rashtriya Bal Puraskar 2021' agütsü

Guwahati, January 25, 2021 (Agencies): Northeast India nungi tanur pezü densema tanur 32 nem Pradhan Mantri Rashtriya Bal Puraskar, 2021 award agütsüogo.

Tasa tasen atongteta mapa kuma inyakba (innovation), shishaliok bushiba, saisapong, arts & culture, lokti tenzükba aser mapa ajanga tasütait sempet sayuba wadang tsütsü alakteta shilem agir tanurtem nem India Sorkar ajanga Pradhan Mantri Rashtriya Bal Puraskar award ya agütsür.

Northeast nungi award angur tanur pezü dak alaka, tanüngba tanur 32 ya states/UTs 21 indang district nungi lir.

Parnok rongnung, Art & Culture wadang tsütsü tanur 7 nem award agütsü. Kasa mapang, Innovation atema tanur 9 aser shishaliok bushiba wadang tsütsü alakteta takok tajung angur tanur 5 nem award agütsüogo.

Category balala nung award angur tanur pezü (northeast) ya Assam nungi Tanuj Samadar (Art &

culture), Manipur nungi Venish Keisham (Art and culture), Tripura nungi Arshiya Das (Sports) aser Sikkim nungi Ayush Ranjan (Innovation) nunger alitsü.

Iba den külemi, saisapong atema tanur 7, Bravery atema tanur 3 aser Social Service atema tanur tetsür ka nem award agütsüogo, ta Union ministry of women & child development sangdong ka ajanga metetdaksü.

Award angurtem nem tenügsang agütsüba mapang, Tir, Ram Nath Kovind-i "Pradhan Mantri Rashtriya Bal Puraskar, 2021 yagi takok angur kisüng dang masü, saka tanga tanur million aikati tajung ajizüka inyaktsü asoshi tali dang ajungmesotsü. Asen linük ajanga tematiba takok aser temoatsü angutsü asoshi asenok ajaki tajungtiba inyakdi."

Hombarnü, video conferencing ajanga Ato Kilonser, Narendra Modi-i award angur tanurtem den jembio.

Garcia-i Manchester City toktsütsü: Guardiola



Eric Garcia

Aenjeti/January 25, 2021 (Agencies): Manchester City manager Pep Guardiola-i ashiba agi, defender Eric Garcia-i season tembangba sülen club toktsür aotsü imlar.

Spain nunger international asayar aser City na tenangzüktepba yanglur aliba iba season tembangba aser pa lanuwa asayaba club Barcelona-i meyipa aotsü atema sendaktepa arudar.

Temang manemi aliba aser yiruba ajanga arishi küm 20

tain asayar ya iba season nung tetoktepba ajak sentepet 8 ben dang asayaa lir, ajisüaka Honibarnü FA Cup nung Cheltenham Town goal 3-1 agi akokba asaya nung pa mezüng nungi asayatsü atema maongka agüja liasü.

"Transfer window tembangba sülen kechi atalokdir iba atema ataa lidi," ta Guardiola-i osangbenertem dang ashi. "Pai tenangzüktepba tasen ka yanglutsü ta nibo mebilerem."

"Season tembangba sülen pai club toktsür aotsü ta bilemer aser taruba transfer window nung pa aotsü maotsüji tanga club dak dang ajak keta lir," ta pai ashi.

City puri point 38 nguteta parnok dang league nung Manchester United sülen tanabuba jenjang nung lir, saka parnok asaya ka tajemba asayar lir. Parnok Mongolbarnü West Bromwich Albion den asayatsü renemdar.

England nunger asayartem anogo 3 dang training agitettsü

London, Aenjeti/January 25 (Agencies): Sri Lanka den asayamung tembangba sülen England team India tonga arur anogo trok quarantine asütsüsa akümba ajanga, February 5 nü nungi Chennai nung India den mezügbuba Test asayatsü aliba asoshi parnok anogo asem dang training agitettsü.

Telegraph' sangdong ka ajanga ashiba agi, England team mezügbuba Test ana atema Bodhbarnü Chennai tonga arutsü aser parnok quarantine asütsü.

Ben Stokes, Jofra Archer aser Rory Burns nunger amala asayar shirnok Sri Lanka den

asaya nung züngoksema mali parnok Deobar aonung India tonga arutsü aser hotel nung quarantine asüba sülen anogo pongu training agitsü atema maongka angutsü.

Anogo trok quarantine asüba mapang asayartem ajak dak Covid-19 tashidak tendangtsü.

England nunger asayartem Sri Lanka atongba sülen ghonda 48 dang lir training agitsü asoshi temelaba agüja liasü. Parnok rongnung Moeen Ali dak dang tashidak poteta liasü.

Wara pokteter aliba mapang tang mezügbuba India nung

international series ka asayatsü atema renemdar.

Asayamung tetsükdaktsü makai asayatetsüji BCCi atema kanga tongtibang lir, shirnoki takumbo IPL India nung asayanüa sentong yangludar.

India aser England na tsüngda tatembangbuba Test ana ya Ahmedabad nung February 24 nü nungi tenzüka asayatsü.

Maneni iba asayamung ya World Test Championship atemaa kanga tongtibang asütsü.

India team-i Australia akokba sülen parnok tang temaba jenjang nung lir.

World Test Championship final asaya anogo melenshir

New Delhi, Aenjeti/January 25 (Agencies): Mezügbuba World Test Championship (WTC) final June 18 nungi 22 tashi asayatsü aser June 23 ya reserve day asütsü. Final ya mezügbuba June 10 nungi 14 tashi Lord's Cricket Ground nung asayatsü renemer liasü.

Osang ajanga ashiba agi, 2021 Indian Premier League final aser WTC final na tsüngda mapang aser coronavirus wara dak sendakba nung asayartem quarantine asütsü aliba apir anogo lemtetogo. India bo final nung asayatsü imlar.

Tang India aser New Zealand na temaba jenjang nung lir. Virat Kohli-i aniba team-i asayamung pongu sülen point 430 nguteta lir aser New Zealand team-i asayamung pongu nung point 420 nguteta lir.

India team ano WTC nung shilem ka ama England den asayatsü aser Australia, shirnok tasembuba jenjang nung lir, parnok South Africa den asayatsü. WTC final nung asayatsü atema Australia-i South Africa akoktsüsa akümtsü.

Covid-19 wara poktetba ajanga taoba küm ICC-i WTC

point-rating system melenshitsü atema telemtetba agi. Asayamung asayar aliba dak ajemdaker points tem percentage inyakyim nung agüja WTC table yanglushitsügo.

Hombarnü England aser Wales Cricket Board (ECB)-i, New Zealand den June 2 nü nung tenzüka test ana asayaa kidang asayamungtem tenzüksü ta sangdongogo.

Joe Root-i aniba team aser Test nung temaba jenjang nung aliba New Zealand team na Lord's (June 2-6) aser Edgbaston (June 10-14) nung asayatsü.

SÜR KÜM KA AJUNGBA BILEMTETER

Mamatetba temeim Oja, na sür küm ka süia oaka mapang aben na bilemteter. Onoki ne temeim, menürem jakden, ajemalu shisatsü, jembishinü aser ne sarasadem teti onok nükla dangi arua menungra bilemteter/mamateter.

**Temeim Chirnurtem,
Semchisemnur aser
kinungertem**



**Mrs. Yashikala Ozüküm,
(Mopungchuket)
26/1/2020**

G. Rio Memorial asayamung Final tanü asayatsü

Dimapur, Aenjeti/January 25 (TYO): Tang asayaa aliba 1buba Late G. Rio Memorial U-19 (Boys) Inter-District Tournament final asaya, Group A nung takoker Dimapur district aser Group B nung takoker Peren District na tsüngda January 26 nü anepdang 9:00 ako nungi tenzüka Nagaland Cricket Stadium, Sovima, Dimapur nung asayatsü.

Asayamung shibangba aser sempet lemtsüba sentong nung asür G. Rio'er jabaso aser

Advisor, Sericulture, Excise & Minority Affairs, Govt. of Nagaland, Zhaleo Rio, IAS (Rtd.) alakteta jaoker asütsü.

Nagaland Cricket Association-i, taoba mapang cricket asaya alirtem aser Nagaland nung cricket asaya meimer ajak dang final asaya arua reprangtsü asoshi metetdaksü, ta Nagaland Cricket Association, Hon. Secretary, Hyunilo Anilo Khing-i sangdong ka ajanga metetdaksü.

Chelsea-i caoch Lampard mapa nungi aginogo



Aenjeti/January 25, 2021 (Agencies): Chelsea manager Frank Lampard Hombarnü mapa nungi aginogo, ta club sangdong ka ajanga metetdaksü. Taoba mapang Paris Saint-Germain aser Borussia Dortmund coach Thomas Tuchel-i pa melentsü akok, ta osang balala ajanga metetdaksügo.

Chelsea pur tang league nung jenjang tekububa nung aser temaba jenjang nung aliba Manchester United dang nungi point 11 agi tejemba aliba mapang arishi küm 42 tain coach yagi club toktsür.

Chelsea puri goal 2-0 agi Leicester City makokba sülen pa mapa nungi agintsü lemtet, kechyong iba tamakok sülen parnoki taoba Premier League asaya ti nung ana dang koka lir.

Deobarnü Tammy Abraham-i hat-trick ka agütsüba ajanga Chelsea pur FA Cup round pongububa tongtetogo, ajisüaka iba asaya akokba yagi Lampard mapa kümzüka meytet aser club kibur Roman Abramovich-i temelenshi

atema mulungteter lir.

Chelsea-i sangdong ka ajanga ashiba agi, iba telemtetba agitsü kanga tasak liasü ta ashiba den manager ama club nung inyakba mapang Lampard-i ajangetbatem ajak atema pa dang kanga pelaba lemsatep.

Chelsea nungi goal timtiba idaktsür aliba asayar den 2019 küm, küm asem atema tenangzüktepba yanglu. Asayartem alizüksü atema tenokdangba agütsür liaka pai team FA Cup final tonga ani aser league nung jenjang pezümba nung mezügbuba küm tembanga liasü.

Season metenzük tsüngda club-i sen aika intoka Ben Chilwell, Kai Havertz aser Timo Werner nunger alizükaka tajungba masayateter. Havertz aser Werner nati junga masayatetba ajanga club nung ketdangsürtem teblemstü akar.

Iba season nung tang tashi nung parnoki asaya trok mekoki lir. League nung taoba asaya ti nung parnoki asaya pongu makok.

BILEMDANGANG

**"Mulungsentsü tamajung dena alirtemi
tanger dak tajung merprangteter."**